

F A C T V M,

Pour Monseigneur le Reuerendissime & Illustrissime Cardinal de Sourdys, Archeuesque de Bordeaux, & Doyen de Saint Emilion, demandeur.


Contre Maistre Estienne Brigard.

LEsparties sont d'accord que le Doyenné contentieux a vaqué par le deceds de feu Messire Arnault de Pontac Euesque de Bazas, dernier titulaire & paisible possesseur d'iceluy. Mais ils n'ont pas cōuenu du iour de son deceds: d'autant que Monsieur le Cardinal pretend qu'il est decedé le 6. Feurier 1605. Et Brigard au contraire pretend qu'il n'estoit pas encores decedé, sans autrement declarer le iour de sa mort.

Brigard est d'accord, & il y en a preuue par escrit, que le huietiesme, d'Alesme a esté esleu par le Chapitre de S. Emilion: mais il pretend que ceste eslection est nulle, & qu'il y en auoit vne autre de la personne d'un nommé Barbot.

Il la demande à nostre S. Pere en ces mots, *Cum Decanatus ruralis*, & en a obtenu signature, dattee *quarto Idus Aprilis anno primo*, qui est le 10. d'Auril 1605. par laquelle il en a esté pourueu *expresso genere vacationis per obitum* de feu M^r. l'Euesque de Bazas, sans exprimer qu'il fust la dignité principale en l'Eglise collegiale de S. Emilion, & qu'il fust eslectif.

Monsieur le Cardinal en a pareillement esté pourueu en Cour de Rome le 29. du mois de May ensuiuant *expresso genere vacationis*, par le mesme deceds & par les nullitez desdites eslections, que le Doyenné estoit la dignité premiere & principale, qu'il estoit eslectif, & qu'il est au Diocese de Bourdeaux,



duquel Monsieur le Cardinal est Archeuesque.

Il en a derechef esté pourueu par la resignation d'Alesme, c'est à dire des droicts qu'il y pretendoit en vertu de son election *sub data Romæ. 3. Id. Ianuarij*, qui est le treziesme de Ianuier 1606. avec toutes les clauses generales.

Derechef il en a esté pourueu par la resignation de Maistre Louys Borie qui se disoit resignataire de feu Monsieur de Bazas, c'est à dire pareillement de ses droicts *sub data*

Et Brigard en a pareillement esté pourueu par des Bulles Apostoliques dattees *tertio Calend. Februarij anno primo, 1605. Mais nostris moribus* c'est le 30. Ianuier 1606.

La question est de sçauoir laquelle de toutes ces prouisions est la meilleure.

A commencer selon l'ordre, celle d'Alesme est la premiere, & consequemment la meilleure, au cas que les moyens proposez contre icelle se rrouuent (comme ils sont) impertinents.

Le premier, que lors d'icelle feu Monsieur de Bazas n'estoit pas decedé, se resout par la verité de l'election: Que Brigard ne iustifie rien au contraire: & que tousiours depuis le deceds est demeuré pour certain.

Au second moyen concernant la sepulture de feu Monsieur de Bazas, la responce est prompte, Que le Canon *Nullus 79. dist.* n'en a rié disposé, & ny peut estre estendu, sinõ par quelque assez eslongnee interpretation, & que encores que au chap. *Bonæ. De elect.* il y en ait quelque mot, toutesfois la glose l'interprete: *Nota* (dit elle) *quod cassatur electio de qua est habitus tractatus ante sepulturam mortui. Can. Nullus. 79. dist. Sed propter hoc solum non fuit cassata. Sed assumit hic Papa quasi non causam, vt causam, sed contentus fuit causa cassationis.* Dont l'auteur rend vne raison pertinente sur la dissolution d'un mariage par le deceds d'un mary: que la veufue *mortuo viro soluta est a lege matrimonij*, & qu'elle se peut marier sans la note d'infamie introduitte par le droict Romain contre celles qui se remariant dedans l'an de leur deuil, *vt Ecclesie statim postquam viduata est de pastore provideatur.*

Au texte *in cap. Quia propter. De elect.* sont rapportees toutes les solemnitez des elections, *nihil de sepultura.*

Et au cas que la solemnité de la sepulture fust requise, que non, elle se doit entendre de celluy qui est mort sur le lieu, & non pas de celluy qui en estoit esloigné lors de son deceds, estant impossible d'enseuelir celluy duquel nous n'auons pas le corps. Brigard ne dira pas que celluy de feu Monsieur de Bazas fust à S. Emilion pour l'enseuelir.

Contre le troisieme moyen fondé sur la celebration de la Messe du Sainct Esprit, Monsieur le Cardinal respond que ce n'est pas vne solemnité necessaire, ainsi que traite Innocence *in cap. cum nobis, de elect.* Ou apres auoir formé le doubte, Si l'election se doit faire au matin, ou apres disner; il resoult qu'elle doit estre faicte au matin, dont il rend la raison en ces mots, *Non est verum propter Missam, quæ ibi consuevit dici, sed propter sobrietatem quæ ibi exigitur.* Et Panorme *in cap. trans Missam*, sous le mesme tiltre, apres auoir proposé vne autre doubte, Si l'esleu peut administrer *post confirmationem*, auparauant que d'estre installé, il resoult que la solemnité de l'installation n'est pas de l'essence, & adiouste ces mots, *Debet fieri installatio, ex quo consuetudo sic habet, sed non est de substantia potestatis administrandi ex quo consuetudo habet ut fiat installatio, nam videtur potius de solemnitate quam de substantia: ut notatur in cod. cap. Quia propter.*

Au quatrieme moyen fondé sur les pretendus Chanoines absens, Monsieur le Cardinal apporte pour responce le texte, *in cap. Quod sicut de Elect.* *Quod si eos* (dit-il) *vocatos non fuisse constitit, sed contemptos, infirmenda erit penitus electio taliter celebrata, nisi postea propter bonum pacis curauerint consentire.* Et la glose sur ce mesme texte, propose l'exemple d'une collation faicte *contempto patrono: ut sit ab initio valida, sed annullanda conqurente patrono.*

Le cinquieme moyen concernant la Communion, & *assumptionem sacratissime Eucharistie*, & toutes les autres solemnitez requises par le Concile de Basle, & rapportees en la Pragmatique sanction, reçoit deux responces pertinentes & peréptiores.

La premiere, que tout le decret *de electionib.* en la pragmatique, est reuocqué par le Concordat. *Tit. de Elect. Abrogat.* Et l'autre est representee par l'Autheur de la glose *in §. & cum humane.* Sous le mesme tiltre, *De Elect. in prag. Sanct.* Que toutes ces solemnitez n'ont lieu sinon aux elections des Prelatures d'Euesques & Abbez. *Aduerte tamen* (dit-il) *quod he due solemnitates, scilicet auditio Missæ, & receptio Eucharistiæ, videntur restringi ad electionem Pontificis, id est Episcopi vel Abbatis supra ibi ad quos Pontificis vel Abbatis sperat electio.* Ce qu'il auoit pris de la glose *in cap. Quia propter in verbis Ecclesiæ viduatis*, en ces mots, *Per hoc videtur quod loquitur tantum de electionibus Prælatorum id est Episcoporum non canonicorum. Sed nunquid etiam extendemus ad omnes dignitates quos Prælatos habent in Ecclesiis viduatis? non videtur.* Et peu apres elle en est escrite la raison, *Cū Ecclesiæ propter illas dignitates non videantur viduate cum habeant Episcopum satis dici potest quod non extenditur ad alias dignitates, sed tantum ad Episcopum & ad regulares Prælaturas, ut sup. eod. Ne pro defectu.*

Au sixiesme moyen de Brigard, que l'election d'Alesme a esté forcee, c'est vn fait duquel tant s'en faut qu'il y ait de preuue, ny qu'il doie estre receu pour estre verifié par tesmoins, que au contraires'il y auoit eu de la force, elle est entierement purgee par le paisible consentement de tous ceux du chapitre, lesquels n'en ont iamais fait de plainte: Et au contraire ils ont receu avec vn tres-grand applaudissement la prouision que Monsieur le Cardinal a obtenuë des droicts d'Alesme par sa resignation. C'est l'argument du texte & l'opinion des Docteurs sur iceluy, *in l. 2. C. de his quæ vi metusue causa fiunt.*

De dire par Brigard, que la raison de ce texte n'a point de lieu *in rebus ecclesiasticis*, il se trompe; d'autant que *valere debet ratio quæ in pari causa paria iura desiderat.* Et combien que ils ayent peut estre varié sur ceste opinion, toutesfois la plus certaine est que *alioquin solemnitates si electionis fuerunt obseruatae*, le vice de la force soit purgé par le commun consentement de tous ceux lesquels y peuuent pretendre interest, ainsi que resoult l'autheur de la glose de la *Pragm. in §. sicut. §. ad tollendum in verbo procedatur de elect.*

Le septiesme moyen de Brigard contre l'eslection d'Alesme est fondé sur vne autre eslection, qu'il dit auoir esté faicte de la personne d'un nommé Barbot. A quoy il est pareillement ayse de respondre, que Barbot n'en a iamais faict de plainte: Qu'au contraire luy mesmé a esté l'un de ceux qui ont assisté à l'eslection d'Alesme, & que l'allegation de ce droit, s'il y en auoit pour Barbot, est mal seante en la bouche de Brigard, lequel ne se peut aucunement preualoir du droit d'un tiers.

Et cela monstre que le faict de la rupture de quelques feuillets du registre du chapitre de Saint Emilion, comme si Monsieur le Cardinal en eust voulu oster la preuue & la cognoissance n'est aduancé sinon pour l'iniurier; d'autant que soit que Barbot ait esté esleu, ou non, la prouision de Brigard ne peut estre pire ny meilleure: & d'ailleurs tant s'en faut que Monsieur le Cardinal en ait voulu oster la cognoissance, qu'au contraire sa prouision est *per nullitatem electionis* de Barbot, au cas qu'il y en eust, dont la preuue seroit pareillement inutile.

Le huitiesme moyen de Brigard est, que l'eslection d'Alesme est simoniaque, & qu'il a baillé de l'argent à Barbot pour le faire departir de l'eslection faicte de sa personne, & qu'il en a pareillement donné à aucuns de ceux qui l'ont esleu. A quoy la responce est aysee, que s'il ya eu quelque vice en ceste eslection de Monsieur le Cardinal, il ne peut tomber sur luy.

Il adioustera que ce faict n'est aduancé, sinon pour empescher le iugement deffinitif du proces, & pour faire que la preuue soit receuë par tesmoins; ce qui ne seroit aucunement raisonnable: d'autant que soit que l'eslection d'Alesme soit bonne ou mauuaise, le droit dudit sieur Cardinal demeure entier, & sans aucune difficulté contre celuy de Brigard.

Ad extremum, Brigard propose que l'eslection d'Alesme n'a point esté confirmee: & la responce est prompte, que ayant faict toutes les poursuites qu'il pouuoit pour l'obtenir, il doit estre censé comme si elle luy auoit esté bien & canoniquement expedicee par la regle commune en droit, que *quoties per aliquem fit quominus aliquid fiat pro facto habendum est.*

Sur ce Brigard accuse d'ambition Monsieur le Cardinal, comme ayant empesché ladite confirmation par le moyen du *nihiltransfat* mis aux offices de Rome. A quoy la response est aisee: Que sa Saincteté ayant intention de gratifier Monsieur le Cardinal de la despouille des benefices de feu Monsieur l'Euesque de Bazas, entant que la disposition luy en appartenoit. Le *nihiltransfat* y ayant esté mis pour vne cause si legitime, nul ne le peut blasmer: ains au contraire il doit estre approuué comme iuste & raisonnable; d'autant que par le moyen d'iceluy nostre Sainct Pere vouloit empeschier qu'il n'eust point de concurrent, par lequel ceste despouille luy peust estre controuuee, ny luy contrainct de plaider sur la gratification qu'il auoit pleu à sa Saincteté de luy en faire: Ce que toutesfois il n'a peu eiter, en ayant Brigard obtenu la signature en vertu de laquelle il luy a fait ce proces auparauant que sa Saincteté eust eu la certitude de la mort de feu Monsieur de Bazas.

Il a esté dit cy-dessus, & Monsieur le Cardinal l'a ainsi remontré par son plaidoyé, que soit que l'eslection d'Alesme soit bonne ou mauuaise, sa prouision se trouuera la meilleure. Et d'autant que celle de Brigard est la premiere en datte, Monsieur le Cardinal soustient qu'elle est nulle.

Primò, en ce que Brigard demande vn Doyenné rural, & que celui dont il s'agist entre les parties n'est point de ceste qualité.

Secundò, qu'il a supprimé qu'il fust *Dignitas principalis in collegiata*.

Tertio, qu'il a pareillement supprimé, qu'il fust eslectif.

La moindre de ces trois considerations est plus que suffisante pour rendre sa prouision nulle, *in cap. Cum in illis §. illis. De Præb. in 6. illis pro quibus scribimus, ut prouideatur eisdem de personatibus, vel dignitatibus etiam si curam babeant animarum ad collationem, prouisionem, presentationem, vel dispositionem spectantibus quibuscumque prouideri nequebit de prælaturis, personatibus, vel dignitatibus ad quos seu quas per electionem ij qui eis habeant præfici assumantur.*

De dire que ce texte s'entende seulement des rescripts & mandats de *prouidendo*, il ne se peut; d'autant que tous les Do-

cteurs l'ont receu pour les prouisions expedices sur les supplications des parties, conformément à la regle 63. de Chancellerie, conceüe en ces mots, *Item voluit quod super beneficijs ecclesiasticis de qualitatibus illorum, videlicet si dignitates, vel personatus, vel officia sunt eisque cura immineat animarum, & ad illa consueuerit quis per electionem assumi mentio fiat alias gratie de super facte sunt nullæ.* Et le glosateur de ceste regle dit, qu'elle est conforme à la disposition de droit. *Et ratio* (dit-il) *est que in qualitatibus sic expressis fundatur iure communi, quia si dignitas est curata, debet fieri mentio de ea, alias gratia erit subrepticia. Idem si sit electiua, vt in Clement. de Preb. & d. cap. cum in illis. §. illis cod. tit. lib. 6.*

Cela est confirmé par Cassadore en la Decision 12. de Preb. tunc, inquit, fuit tentum quod impetrans dignitatem Ecclesie collegiate, electiuam licet mentionem faciat de collegio nihil agit, nisi etiam dixerit quod est electiua, vt in d. Clem. Et par de Selua in Tracta. Benef. tertia parte quæst. 11^a. decima sexta qualitas, dit-il, in beneficiis impetrandis est, quod exprimatur & fiat mentio quod beneficium est electiuum, vt est textus in cap. cum in illis &c. Ad ioustant peu apres, Quod ad hoc, vt dicatur facta mentio quod dignitas est electiua, non sufficit facere mentionem de collegio, nisi dicatur quod sit electiua, facit decisio Rotæ 3. De Preb. in antiquiorib.

Pareillement de dire, que toutes ces deffectuositez soient suppléées & entendues par la clause escrite en la signature de Brigard, & quod premissorum omnium etiam qualitarum, inuocationum, annexorum, fructuum, aliorumque necessariorum maior & verior expressio fieri possit in litteris, il ne se peut: d'autant qu'il faudroit que Brigard eust obtenu litteras, c'est à dire, les Bulles où les qualitez qu'il pretend fussent exprimees: Ne les ayant pas, il est impossible de dire qu'il se puisse ayder de ceste clause, laquelle futuram continet expressionem, & de laquelle d'ailleurs il ny a preue que par imagination.

Imò verò, de dire que Brigard eust peu obtenir en Cour de Rome des Bulles contenans toutes les expressions de ce qu'il a supprimé, il ne se peut, d'autant que ces mots generaux ne se peuuent estendre sinon aux qualitez & circonstances, lesquelles se trouuent comme necessaires, Et quasi veniunt per ne-

cessariam consequentiam eorum que expressa sunt, ainsi que sur vn semblable subiect le Iurifconsulte a respondu, *in l. item apud Labeonem §. hoc edictum D. de iniur.* où apres auoir expliqué aucuns des mots de l'Edict du Preteur, *hoc edictum*, dit-il, *superuacuum esse* Labeo ait. *Quippe cum ex generali iniuriarum agere possimus. Sed videtur & ipsi Labeoni, & ita se habet prætorem eamdem rem sequutū, voluisse etiam specialiter de ea re loqui, ea enim que notabiliter fiunt nisi specialiter notentur, videntur quasi neglecta.*

Si Brigard entendoit demander le Doyenné contentieux comme dignité principale *in collegiata*, & comme effectif, *specialiter de ea re loqui debebat*: Ne l'ayant pas fait, voire n'y ayant mis vn seul mot qui en approche, *verum est*, de dire *non solum*, qu'il l'a negligé: Ains qu'il n'y a iamais pensé. Et cela est décidé *in cap. Sedes de refer.* par lequel, *non licet ei super grauioribus & maioribus agere, qui de leuioribus & minoribus mentionem fecit.* Monsieur le Cardinal peut dire par l'argument de ce texte, que *nullo modo potest censeri dignitatem in collegiata Ecclesia & electiuam que grauior & maior est sibi conferre postulasse.*

Cela est décidé par le Cardinal Zabarelle sur la Clementine premiere, *de præb. quarto nota*, dit-il, *quod clausula posita ad finem rescripti non debet operari eius extentionem si aliud non appareat*: Sic etiā *clausula inhibitionis non ampliat gratiam, ut hic dicitur &c.* peu apres lesquels mots sont ceux qui s'ensuiuent. *Secundo, oppono ad hoc. §. De Procurato. Qui ad agendū lib. 6. solu. laud. quod clausula generalis bene cōprehendit alia quam expressa si sint eiusdem generis, vel conditionis. non alterius separati & diuersi maxime si sint grauiora de rescrip. Sedes de offic. vic. cum in generali lib. 6. dignitas autem ad quā quis assumitur per electionem maior alijs & diuersi generis censetur.*

Maximè, que la qualité de rural est du tout contraire à la dignité principale & electiue, *in collegiata*, & que *duo contraria in eodem subiecto subsistere non possunt*, disent les Philosophes.

Et Rebuffe qui est l'auteur allegué par Brigard vuide ceste question, *in pract. benef.* en interpretant les clauses de la signature, *in verbo annexorum.* Item *ratione clausule quod qualitates exprimi possunt non tamen potest exprimi maior dignitas post pōtiscal. m, nec principalis in Ecclesia collegiata, quia est ibi duplex reservatio, ex illa*

non debetur quando etiam prouideri mandatur de Ecclesia cap. fin. de preb. nec poterit extensio fieri quæ in aliam speciem extensionis transeat arg. l. si quis ex consensu. C. de Episco. §. Sequitur Paul. Paris. cons. 42. quatum. num. 23. in quarto volum. &c. Le mesme autheur adioulte peu apres la clause qui s'ensuit, Imo etiam si quis impetrauerit omnia beneficia quæ talis familiaris Cardinalis &c. Solebat cum clausula quod qualitates exprimi possunt adhuc non poterit exprimi maior, vel principalis, vel quod sit conuentuale, & iste est stilus curiæ Romanæ, quia istæ qualitates specialius exprimi debent.

De dire par Brigard que le Pape luy eust donné sa prouision avec autant de facilité si toutes les qualitez eussent esté expri-
mees, & que de fait il luy en a accordé la dernière. La respon-
ce est prompte, qu'il ne faut pas s'enquerir si le Pape l'eust fait
ou non: ains qu'il ne l'a pas demandé, & que sa Sainteté ne le
luy a pas donné.

Les nullitez des prouisions ne se peuuent reparer sous ce
pretexte, il ne faut pas douter que en exprimant vn benefice
simple par l'orateur, lequel en demande vn autre, le Pape ne
les luy eust volontairement accordé tous deux: Et toutesfois,
suppressio primi, rend sa prouision nulle. I e Conseil l'a ainsi iugé
pour le Prieuré de la Reole au proffit du nommé de Monsieur
de Seue lors Conseiller du Roy, & Maistre des Requestes or-
dinaire de son hostel, & de present premier President en la
Cour des Aydes.

Si l'Orateur Prestre & capable est pourueu d'un Prieuré cō-
uétuel en qualité de simple, sa prouision ne vaut rien, & celluy
qui l'aura obtenu *tanquam conuentuale*, l'emportera & y fera re-
mettre la conuentualité, ainsi qu'il a esté iugé pour le Prieuré
de S. Gondon.

Il seroit aisé de représenter vn grand nombre d'autres ex-
ples; mais il suffira d'adioulter que l'expression est nécessaire
pour empescher que les qualitez & consequemment les fon-
dations des Benefices ne soient changez comme elles peuuent
estre prescriptes par quarante ans, *cap. cum de beneficio de preben.*

Outre la viciueuse expression que le Doyenné fust rural, & la
suppression des veritables qualitez du Doyenné contentieux,

Brigard n'a pas fait entendre que le Chapitre auoit esleu, & consequemment preueni sa Saincteté, laquelle au cas qu'elle eust esté instruite de ceste eslection, ne l'eust pas voulu conferer, sinon par la nullité d'icelle, ce que Brigard n'a pas demandé.

Demeurant donc la premiere prouision de Brigard nulle, & bõne celle de Monsieur le Cardinal demeurant, *querendum est* si il y a quelque defectuosité en icelle, par le moyen de laquelle il en doie estre priué.

Brigard dit quelle est ambitieuse, à cause du *nihil transeat*, auquel il a esté respõdu, que Monsieur le Cardinal a bien aprins que *ambitiosa est petitio* du Benefice d'un homme viuant *in cap. 1. Concess. preb.* Mais que ce soit vne ambition d'empescher que vn autre que nous ne soit pourueu d'un Benefice vacant, à la simple gratificatiõ de celuy qui le peut cõferer, c'est chose dont il n'a iamais ouy parler: Aussi est-elle sans loy, chapitre, auctorité, ny raison.

Il dict que Monsieur le Cardinal auoit le droit de conferer, *ergo* qu'il n'en a peu estre pourueu: Et la responce est prompte que toutes les parties de cest argument sont eslongnees de la verité.

Le simple droit de cõfirmer l'eslection luy appartenoit, & nõ pas le droit de conferer, la diuersité des mots monstre que ces droits sont diuers & dissemblables, & le texte *in cap. pro defectu de elect.* ne donne autre puissance au confirmateur, sinon de faire proceder par l'aduis de son Chapitre à vne nouuelle eslection, qui est bien loin de conferer.

Quand ainsi seroit que Monsieur le Cardinal eust peu conferer ce Doyené, que non, il est bien d'accord qu'il ne le pouoit conferer à soy mesme: par la disposition du texte *in cap. fin. de instit. ut differentia sit inter dantem & accipiẽtem.*

Mais il soustiẽt que si quelqu'autre le luy confere valablement, il n'y a rien qui puisse empescher, qu'il ne le puisse valablement accepter, & qu'il n'en soit canoniquement pourueu.

C'est ce que la glose dit *in d. cap. fin. de instit.* Que si le Collateur *alij potestatem tribuit conferendi potest ab eo recipere.* Et aux textes, ensemble la glose *in cap. cum in iure peritus de elect.* il se trouue,

Que si les eslisans ont compromis en sept personnes, & que *vnus ex septem à tribus ipsorum & alius qui non erat de numero eligentium à tribus alijs in Decanum fuerint nominati*. Le Pape respõd, *quod is qui de numero septem à tribus eorum dignoscitur nominatus iuxta compromissi tenorem debet in Decanum assumi*.

La premiere partie pour vn benefice eslectif consiste aux eslisans, puis que l'vn de ceux qui ont puissance d'eslire peut estre vallablement esleu, il s'en suit que la mesme capacité reside en la personne de celluy qui a le seul droict de confirmer.

Et la glose passe oultre, *Que si vni tantum collata esset potestas eligendi, seipsum eligere potest*, en ces mots, *Dicunt quidam quod si iurasset eligere meliorem, & ipse esset melior, tunc posset se eligere*.

Panorme resoult ceste question en peu de mots *in d. cap. fin. de instit. Ex hoc*, dit-il, *infertur quod habens ius conferendi potest beneficium recipere à Papa. Item à Legato in partibus quia illi conferunt iure proprio ad hoc cap. Si a sede de preb. lib. 6. Et sic intellige textum, hic*.

Brigard propose vn autre moyen contre la prouision de Monsieur le Cardinal de Sourdis, sçauoir qu'il n'a pas exprimé que le droict de confirmer luy appartenoit: Mais à cela il y a deux responces pertinentes: L'vne qu'il n'y a loy, texte, chapitre, ny autorité qui die que ceste expression fust necessaire.

Et l'autre, qu'il l'a plus que suffisamment exprimé, ayant fait entendre que le Doyenné estoit eslectif, & qu'il estoit au Diocèse de Bordeaux duquel Monsieur le Cardinal de Sourdis est Archeuesque: ny ayant maxime plus certaine en droict, que celle par laquelle nous disons, que le droict de confirmer les eslections appartient aux Diocesains, Euesques ou Archeuesques, *cap. 3. de elect. can. Nullus 16. qu. 7. & cap. cum ex iniuncto de her.* en ces mots, *Agendum est ordinatè apud Episcopum ad cuius officium tam institutio quam destitutio sacerdotum noscitur pertinere*. Et de dire que sa Saincteté *que in scrinio pectoris omnia iura, leges & constitutiones habere dicitur*, l'ait ignoré, *absurdum esset*.

Il en propose encores vne autre, que Monsieur le Cardinal n'est pas dispensé de tenir le Doyenné contentieux, & que la dispense luy estoit necessaire à cause qu'il en a la confirmation: A quoy la responce est pareillemēt prompte, *Que en cela, nihil*

est prohibitum quod indigeat dispensatione.

Et l'Epistre de *Iuo Carnotensis Episcopus*, laquelle est mise pour vn prologue au commencement de son decret, faict assez connoistre, que la dispense n'est autre chose, sinon *quedam contra rigorem discipline & constitutionum vel regulas & statuta autoritate presidentium diligenter deliberata concessio.*

De preuue qu'il y ait aucun article de discipline, cōstitution, regle ou statut par lesquels il soit deffendu à ceux qui eslisent, confirment & instituent d'accepter vn Benefice duquel ils sont eslecteurs, confirmateurs & instituteurs, Brigard n'en pourroit coter: au contraire il a esté monstré cy dessus, qu'ils le peuuent librement & legitiment accepter: Et partant de dire qu'il fust necessaire d'auoir aucune dispence, il ne se peut.

Et quand il faudroit (que non) il est certain que en conferāt le Doyenné contentieux à Monsieur le Cardinal, avec toutes les expressions qui se peuuent desirer, ainsi qu'il a esté dit cy dessus, Il l'a plus que suffisamment dispensé, au cas que la dispence eust esté necessaire.

Pour le dernier effort de Brigard il apporte sa derniere prouision, en laquelle il dit, Que tous les genres des vaccatiōs sont compris en vertu des clauses generales, *aut alias quouismodo, siue ex cuiuscumque persona*: mais luy mesme se trouue si empesché qu'il n'en peut coter vn seul.

Si telles clauses doiuent emporter le Benefice, elles sont aux prouisions de Monsieur le Cardinal obtenues auparauint la derniere de Brigard.

Et celluy qu'il propose sur des faicts qu'il pretend veriffier par tesmoins, Monsieur le Cardinal respond, Que sa pieté cognüe par nostre S. Pere, & par tous les bons Catholiques, sa vie, ses mœurs, ses comportements, & sa qualité, l'exemptent de la calomnie desdits faicts, sur l'accusation desquels, au cas qu'il y en eust tant soit peu de soupçon contre luy (que non) Brigard ne pourroit estre receu accusateur.

Monsieur Bautre Rapporteur.

